


220





東夷列傳第一百四十五

唐書二百二十

端明殿學士兼翰林侍讀學士龍圖閣學士朝請大夫守尚

書吏部侍郎充集賢殿脩撰臣宋 祁奉 敕撰

高麗本扶餘別種也地東跨海距新羅南亦跨海  
距百濟西北度遼水與營州接北靺鞨其君居平  
壤城亦謂長安城漢樂浪郡也去京師五千里而  
羸隨山屈繚爲郭南涯淇水王築宮其左又有國  
內城漢城號別都水有大遼少遼大遼出靺鞨西  
南山南歷安市城少遼出遼山西亦南流有梁水  
出塞外西行與之合有馬些泉出靺鞨之白山色



若鴨頭號鴨渌水歷國內城西與鹽難水合又西南至安市入于海而平壤在鴨渌東南以巨艦濟人因恃以爲漸官凡十二級曰大對盧或曰吐粹曰鬱折王圖簿者曰太大使者曰帛衣頭大兄所謂帛衣者先人也秉國政三歲一易善職則否凡代日有不服則相攻王爲閉宮守勝者聽爲之曰大使者曰大兄曰上位使者曰諸兄曰小使者曰過節曰先人曰古鄒大加其州縣六十大城置僑薩一比都督餘城置處閭近支亦號道使比刺史有參佐分幹有大模達比衛將軍末客比中郎將

分五部曰丙部即漢桂婁部也亦號黃部曰北部即絕奴部也或號後部曰東部即順奴部也或號左部曰南部即灌奴部也亦號前部曰西部即消奴部也王服五采以白羅製冠黃帶皆金釵大臣青羅冠次絳羅珥兩鳥羽金銀雜釵衫角褱袴大口白羣帶黃革履庶人衣褐戴弁女子首巾幘俗喜弈投壺楚鞠食用邊豆簞簞壘洗居依山谷以草茨屋惟王宮官府佛廬以瓦窰民盛冬作長坑煨火以取煖其治峭法以繩下故少犯叛者叢炬灼體乃斬之籍入其家降敗殺人及剽劫者斬盜



者十倍取償殺牛馬者沒爲奴婢故道不撥遺婚娶不用幣有受者恥之服父母喪三年兄弟踰月除俗多淫祠祀靈星及日箕子可汗等神國左有大穴曰神隧每十月王皆自祭人喜學至窮里斯家亦相矜勉衢側悉構嚴屋號局堂子弟未婚者曹處誦經習射隋末其王高元死異母弟建武嗣武德初再遣使入朝高祖下書脩好約高麗人在中國者護送中國人在高麗者敕遣還於是建武悉搜亡命歸有司且萬人後三年遣使者拜爲上柱國遼東郡王高麗王命道士以像法往爲講老

子建武大悅率國人共聽之日數千人帝謂左右曰名實須相副高麗雖臣於隋而終拒煬帝何臣之爲朕務安人何必受其臣裴矩溫彥博諫曰遼東本箕子國魏晉時故封內不可不臣中國與夷狄猶太陽於列星不可以降乃止明年新羅百濟上書言建武閉道使不得朝且數侵入有詔散騎侍郎朱子奢持節諭和建武謝罪乃請與二國平太宗已禽突厥頡利建武遣使者賀并上封域圖帝詔廣州司馬長孫師臨塞隋士戰鬪毀高麗所立京觀建武懼乃築長城千里東北首扶餘西南



屬之海久之遣太子桓權入朝獻方物帝厚賜資  
詔使者陳大德持節答勞日觀豐大德入其國厚  
餉官守悉得其纖曲見華人流客者為道親戚存  
亡人人垂涕故所至士女夾道觀建武盛陳兵見  
使者大德還奏帝悅大德又言聞高昌滅其大  
對盧三至館有加禮焉帝曰高麗地止四郡我發  
卒數萬攻遼東諸城必救我以舟師自東萊颶海  
趨平壤固易然天下甫平不欲勞人耳有蓋蘇文  
者或號蓋金姓泉氏自云生水中以惑眾性忍暴  
父為東部大人對盧死蓋蘇文當嗣國人惡之

不得立頓首謝眾請攝職有不可雖廢無悔眾哀  
之遂嗣位殘凶不道諸大臣與建武議誅之蓋蘇  
文覺悉召諸部給云大閱兵列饜具請大臣臨視  
賓至盡殺之凡百餘人馳入宮殺建武殘其尸投  
諸溝更立建武弟之子藏為王自為莫離支專國  
猶唐兵部尚書中書令職云貌魁秀美須髯冠服  
皆飾以金佩五刀左右莫敢仰視使貴人伏諸地  
踐以升馬出入陳兵長呼禁切行人畏竄至投坑  
谷帝聞建武為下所殺惻然遣使者持節弔祭或  
勸帝可遂討之帝不欲因喪伐罪乃拜藏為遼東



郡王高麗王帝曰蓋蘇又殺君攘國朕取之易耳  
不願勞人若何司空房玄齡曰陛下士勇而力有  
餘戢不用所謂止戈爲武者司徒長孫無忌曰高  
麗無一介告難宜賜書安尉之隱其患撫其存彼  
當聽命帝曰善會新羅遣使者上書言高麗百濟  
聯和將見討謹歸命天子帝問若何而免使者曰  
計窮矣惟陛下哀憐帝曰我以偏兵率契丹靺鞨  
入遼東而國可紓一歲一策也我以絳袍丹幟數  
千賜而國至建以陣二國見謂我師至必走二策  
也百濟恃海不脩戎械我以舟師數萬龍衣之而國

汝君故爲鄰侮我以宗室主而國待安則自守之  
三策也使若計孰取使者不能對於是遣司農丞  
相里玄獎以璽書讓高麗且使止勿攻使未至而  
蓋蘇文已取新羅二城玄獎諭帝旨答曰往隋見  
侵新羅乘輿奪我地五百里今非盡反地兵不止  
玄獎曰往事烏足論邪遼東故中國郡縣天子且  
不取高麗焉得違詔不從玄獎還奏帝曰莫離支  
殺君虐用其下如獲罪怨庸海道找出師無名哉  
諫議大夫褚遂良曰陛下之兵度遼而克固善萬  
分一不得逞且再用師再用師安危不可億兵部



尚書李勣曰不然曩薛延陀盜邊陛下欲追擊魏徵苦諫而止向若擊之一馬不生返後復畔擾至今爲恨帝曰誠然但一慮之失而无之後誰爲我計者新羅數請援乃下兵船四百拖輸糧詔營州都督張儉等發幽營兵及契丹奚靺鞨等出討會遼溢師還莫離支懼遣使者內金帝不納使者又言莫離支遣官五十入宿衛帝怒責使者曰而等委質高武而不伏節死義又爲逆子謀不可赦悉下之獄於是帝欲自將討之召長安耆老勞曰遼東故中國地而莫離支賊殺其主朕將自行經略

之故與父老約子若孫從我行若我能拊循之母庸卹也即摩賜布粟群臣皆勸帝毋行帝曰吾知之矣去本而就末捨高以取下釋近而之遠三者爲不祥伐高麗是也然蓋蘇文弒君又戮大臣以逞一國之人延頸待救議者顧未亮耳於是北輸粟營州東儲粟十口大人城帝幸洛陽乃以張亮爲平壤道行軍大摠管常何左難當副之冉仁德劉英行張文幹龐孝泰程名振爲摠管帥江吳京洛募兵凡四萬兵艘五百泛海趨平壤以李勣爲遼東道行軍大摠管江夏王道宗副之張士貴張儉



執失思力契苾何力阿史那彌射姜德本麴智盛  
吳黑闥爲行軍總管隸之帥騎士六萬趨遼東詔  
曰朕所過管頓毋飭食毋豐怪水可涉者勿作橋  
梁行在非近州縣不得令學生耆老迎謁朕昔提  
戈撥亂無盈曰儲猶所嚮風靡今幸家給人足祗  
恐勞於轉餉故驅牛羊以飼軍且朕必勝有五以  
我大繫彼小以我順討彼逆以我安乘彼亂以我  
逸敵彼勞以我悅當彼怨渠憂不克邪又發契丹  
奚新羅百濟諸君長兵悉會十九年二月帝自洛  
陽次定州謂左右曰今天下大定唯遼東未賓後

嗣因士馬盛彊謀臣導以征討喪亂方始朕故自  
取之不遺後世憂也帝坐城門過兵人人撫慰疾  
病者親視之敕州縣治療士大悅長孫無忌白奏  
天下符魚悉從而宮官止十人天下以爲輕神器  
帝曰士度遼十萬皆去家室朕以十人從尚慮其  
多公止勿言帝身爲蠶桑房結兩服於窳韋四月勦濟  
遼水高麗皆嬰城守帝大饗食士帳幽州之南詔長  
孫無忌誓師乃引而東勦攻蓋牟城拔之得戶二  
萬糧十萬石以其地爲蓋州程名振攻沙卑城夜  
入其西城潰虜其口八千游兵鴨綠上勦遂圍遼



東城帝次遼澤詔瘞隋戰士露路高麗發新城國  
內城騎四萬救遼東道宗率張君乂逆戰君乂却  
道宗以騎馳之虜兵辟易奪其梁收散卒乘高以  
望見高麗陣蹶急擊破之斬首千餘級殊君乂以  
徇帝度遼水徹杠約堅士心營馬首山身到城下  
見士填塹分負之重者馬上持之羣臣震懼爭挾  
塊以進城有朱蒙祠祠有鎖甲鉞矛妄言前燕世  
天所降方圍惡飾美女以婦神巫言朱蒙悅城必  
完勦列拋車飛大石過三百步所當輒潰虜積木  
爲樓結組罔不能拒以衝車撞陴屋碎之時公濟

上金聚鎧又以玄金爲山五文鎧士被以從帝與  
勦會甲光炫日會南風急士縱火焚西南標延城  
中屋幾盡人死于燎者萬餘衆登陴虜蒙盾以拒  
士舉長矛春之藺石如雨城遂潰獲勝兵萬戶四  
萬糧五十萬石以其地爲遼州初帝自太子所屬  
行在舍置一烽約下遼東舉烽是日傳燎入塞進  
攻白崖城城負山崖水險甚帝壁西北虜酋孫伐  
音陰丐降然城中不能一帝賜幟曰若降建于堞  
以信俄而舉幟城人皆以唐兵登矣乃降初伐音  
中悔帝怒約以虜口界諸將及是李勣曰士奮而



先貪虜獲也。今城危拔不可許降。以孤士心。帝曰：將軍言是也。然縱岳殺戮略人妻孥，朕不忍將軍麾下有功者，朕能以庫物當之。庶因將軍贖一城乎？獲男女凡萬，兵二千，以其地爲巖州。拜伐音爲刺史。莫離友以加尸人七百成盡，牟勣俘之，請自効。帝曰：而家加尸，乃爲我戰將盡戮矣。夷一姓求一人力不可稟，而縱之。次安市，於是高麗北部僣薩高延壽、南部僣薩高惠真引兵及靺鞨衆十五萬來援。帝曰：彼若勒兵連安市而壁據高山，取城中粟食之，縱靺鞨略吾牛馬，攻之不可下。此上策。

也。拔城夜去，中策也。與吾爭鋒，則禽矣。有大對虜爲延壽計曰：吾聞中國亂，豪雄並奮。秦王神武，敵無堅戰，無前遂定天下。南面而帝北狄，西戎罔不臣。今掃地而來，謀臣重將皆在其鋒，不可校。今莫若頓兵曠日，陰遣奇兵絕其饒道，不旬月糧盡，欲戰不得，歸則無路，乃可取也。延壽不從。引軍距安市四十里而屯。帝曰：虜情善，策中矣。命左衛大將軍阿史那社爾以突厥千騎嘗之。虜常以靺鞨銳兵居前，社爾兵接而北。延壽曰：唐易與耳。進一舍倚麓而陣。帝詔延壽曰：我以爾有疆，臣賊殺其主。



來問罪即交戰非我意延壽謂然按甲俟帝夜召諸將使李勣率步騎萬五千陣西嶺當賊長孫无忌牛進達精兵萬人出虜背狹谷帝以騎四千偃幟趨虜北山上令諸軍曰聞鼓聲而縱張幄朝堂曰明日日中納降虜於此是夜流星墮延壽營曰日虜視勣軍少即戰帝望无忌軍塵上命鼓角佯兵幟四合虜惶惑將分兵禦之衆已蹶勣以步騎擊敗之无忌乘其後帝自山馳下虜大亂斬首二萬級延壽收餘衆負山自固无忌勣合圍之徭川梁斷歸路帝按轡觀虜營壘曰高麗傾國來一麾

而破天贊我也下馬再拜謝況于天延壽等度勢窮即舉衆降入轅門膝而前拜手請命帝曰後敢與天子戰乎惶汗不得對帝料酋長二千五百人悉官之許內徙餘衆二萬縱還之誅靺鞨三千餘人獲馬牛十萬明光鎧萬領高麗震駭后黃銀二城自技去數百里無舍煙乃罪報太子并賜諸臣書曰朕自將若此云何因號以幸山爲駐驂山圍破陣狀勒石紀功拜延壽鴻臚卿惠真司農卿侯騎獲覘人帝解其縛自言不食且二日命飼之賜以喬遣曰歸語莫離支若須軍中進退可遣人至



吾所帝每營不作斬壘謹斥候而已而士運糧雖  
軍騎虜不敢鈔帝與勣議所攻帝曰吾聞安市地  
險而衆悍莫離支擊不能下因與之建安恃險絕  
粟多而士少若出其不意攻之不相救矣建安得  
則安市在吾腹中勣曰不然積糧遼東而西擊建  
安賊將梗我歸路不如先攻安市帝曰善遂攻之  
未能下延壽惠真謀曰烏骨城僣薩巴耄朝攻而  
夕可下烏骨拔則平壤舉矣羣臣亦以張亮軍在  
沙城召之一昔至若取烏骨度鴨渌迫其腹心計  
之善者无忌曰天子行師不徼幸安市衆十萬在

吾後不如先破之乃驅而南萬全勢也乃止城中  
見帝旌麾輒乘陴譟帝怒勣請破日男子盡誅虜  
聞故死戰江身王道宗築距闔攻東南虜增陴以  
守勣攻其西撞車所壞隨輒串柵為樓帝聞城中  
鷄彘聲曰圍久突無黔煙今鷄彘鳴必殺以饗食士  
虜且夜出詔嚴兵丙夜虜數百人繼而下悉禽之  
道宗以樹枝裹土積之距闔成道城不數丈果毅  
都尉傅伏愛守之自高而排其城城且頽伏愛私  
去所部虜兵得自頽城出據而斬斷之積火縈盾  
固守帝怒斬伏愛敕諸將擊之三日不克有詔班



師拔遼蓋二州之人以歸兵過城下城中屏息偃旗酋長登城再拜帝嘉其守賜絹百匹遼州粟尚十萬斛士取不能盡帝至渤錯水阻淖八十里車騎不通長孫无忌揚師道等率萬人斬樵築道輿車爲梁帝負薪馬上助役十月兵畢度雪其詔屬燎以待濟始行士十萬馬萬匹逮還物故裁千餘馬死十八船師七萬物故亦數百詔集戰骸葬柳城祭以太牢帝臨哭從臣皆流涕帝怒飛騎入臨渝關皇太子迎道左初帝與太子別御褐袍曰俟見爾乃更袍歷一時弗易至穿穴羣臣請更服帝

曰士皆敝衣吾可新服邪及是太子進紵衣乃御遼降口萬四千當沒爲奴婢前集幽州將分賞士帝以父子夫婦離析詔有司以布帛贖之原爲民列拜謹舞三日不息延壽旣降以憂死獨惠貞至長安明年春藏遣使者上方物且謝罪獻二姝口帝敕還之謂使者曰色者人所重然愍其去親戚以傷乃心我不取也初師還帝以弓服賜蓋蘇文受之不遣使者謝於是下詔削棄朝貢又明年三月詔左武衛大將軍牛進達爲青丘道行軍大總管右武衛將軍李海岸副之自萊州度海李勣爲



遼東道行軍大總管右武衛將軍孫貳朗右屯衛  
大將軍鄭仁泰副之率營州都督兵繇新城道以  
進次南蘇木底虜兵戰不勝焚其郭七月進達等  
取石城進攻積利城斬級數千乃皆還藏遣子莫  
離支高任武來朝因謝罪二十二年詔右武衛大  
將軍薛萬徹爲青丘道行軍大總管右衛將軍裴  
行方副之自海道入部將古神感與虜戰曷山虜  
潰虜乘瞋龍衣我舟伏兵破之萬徹度鴨渌次泊灼  
城拒四十里而舍虜懼皆棄邑居去大酋所夫孫  
拒戰萬徹擊斬之遂圍城破其援兵二萬乃還帝

與長孫无忌計曰高麗困吾師之入戶亡耗田歲  
不收蓋蘇文築城增陴下飢卧死溝壑不勝數矣  
明年以三十萬衆公爲大總管一舉可滅也乃詔  
劔南大治船蜀人願輸財江南計直作舟舟取縑  
千二百巴蜀大騷邛眉雅三州掠皆反發隴西峽  
內兵二萬擊定之始帝決取虜故詔陝州刺史孫  
伏伽萊州刺史李道裕儲糧械於三山浦烏胡島  
越州都督治大艦偶舫以待會帝崩乃皆罷藏遣  
使者奉慰未幾五年藏以靺鞨兵攻契丹戰新城  
大風矢皆還激爲契丹所乘大敗契丹火野復戰



人死相藉積尸而家之遣使者告捷高宗爲露布于朝六年新羅訴高麗靺鞨奪三十六城惟天子哀救有詔營州都督程名振左衛中郎將蘇定方率師討之至新城敗高麗兵火外郭及墟落引還顯慶二年復遣名振率薛仁貴攻之未能克後二年天子已平百濟乃以左驍衛大將軍契苾何力右武衛大將軍蘇定方左驍衛將軍劉伯英率諸將出沮江遼東平壤道討之龍朔元年大募兵拜置諸將天子欲自行蔚州刺史李君球建言高麗小醜何至傾中國事之有如高麗旣滅必發兵以

守少發則威不振多發人不安是天下疲於轉戍臣謂征之未如勿征滅之未如勿滅亦會武后苦邀帝乃止八月定方破虜兵於沮江奪馬邑山遂圍平壤明年龐孝泰以嶺南兵壁蛇水蓋蘇文攻之舉軍沒定方解而歸乾封元年藏遣子男福從天子封泰山還而蓋蘇文死子男生代爲莫離支與弟男建男產相怨男生據國內城遣子獻誠入朝求救蓋蘇文弟淨土亦請割地降乃詔契苾何力爲遼東道安撫大使左金吾衛將軍龐同善營州都督高侃爲行軍摠管左武衛將軍薛仁貴左



監門將軍李謹行斃而行九月同善破高麗兵男  
生率師來會詔拜同善特進遼東大都督兼平壤  
道安撫大使封玄菟郡公又以李勣為遼東道行  
軍大總管兼安撫大使與契苾何力龐同善并力  
詔獨孤卿雲由鴨綠道郭待封積利道劉仁願畢  
列道金特問海谷道並為行軍總管受勣節度轉  
燕趙食膾遼東明年正月勣引道次新城合諸將  
謀曰新城賊西鄙不先圖餘城未易下遂壁西南  
山臨城城人縛戍酋出降勣進拔城十有六郭待  
封以舟師濟海趨平壤二年二月勣率仁貴拔扶

餘城它城三十皆納款同善偏守新城男建遺兵  
襲之仁貴救偏戰金山不勝高麗鼓而進銳甚仁  
貴橫擊大破之斬首五萬級拔南蘇木底蒼巖三  
城引兵略地與勣會侍御史賈言忠計事還帝問  
軍中云何對曰必克昔先帝問罪所以不得志者  
虜未有豐也諺曰軍無謀中道回卒男生兄弟閱  
很為我鄉導虜之情偽我盡知之將忠士力臣故  
曰必克且高麗秘記曰不及九百年當有八十大  
將滅之高氏自漢有國今九百年勣年八十矣虜  
仍荐飢人相掠賣地震裂狼狐入城蚘穴於門人



心危駭是行不再舉矣男建以兵五萬襲扶餘勦破之薩賀水上斬首五千級俘口三萬器械牛馬稱之進拔大行城劉仁願與勦會後期召還當誅赦流姚州契苾何力會勦軍于鴨淥拔辱夷城悉師圍平壤九月藏遣男產率首領百人樹素幡降且請入朝勦以禮見而男建猶固守出戰數北大將淳屠信誠遣謀約內應五日闔啓兵譟而入火其門鬱燭四興男建窘急自刺不殊執藏男建等收凡五部百七十六城戶六十九萬詔勦便道獻俘昭陵凱而還十一月帝坐含元殿弘見勦等數

俘于廷以藏素為督制赦為司平太常伯男產司空少卿投男建黔州百濟王扶餘隆嶺外以獻誠為司衛卿信誠為銀青光祿大夫男生右衛大將軍何力行左衛大將軍勦兼太子太師仁貴威衛大將軍剖其地為都督府者九州四十二縣百復置安東都護府擢酋豪有功者授都督刺史令與華官參治仁貴為都護摠兵鎮之是歲郊祭以高麗平謝成于天摠章二年徙高麗民三萬於江淮山南大長鉗牟岑率眾反立藏外孫安舜為王詔高倨東州道李謹行燕山道並為行軍摠管討之遣



司平太常伯楊昉綏納亡餘舜殺鉗牟走新羅  
倂徙都護府治遼東州破叛兵於安市又敗之泉  
山俘新羅援兵二千李謹行破之于發盧河再戰  
俘馘萬計於是平壤瘵殘不能軍相率奔新羅凡  
四年乃平始謹行留妻劉守伐奴城虜攻之劉擐  
甲勒兵守賊引去帝嘉之封燕郡夫人儀鳳二年  
授藏遼東都督封朝鮮郡王還遼東以安餘民先  
編僑內州者皆原遣徙安東都護府於新城藏與  
靺鞨謀反未及發乃召還放邛州斬其人于河南隴  
右弱婁者留安東藏以永淳初死贈衛尉卿葬頡

利墓左樹碑其阡舊藏往往入新羅遺人散奔突  
厥靺鞨由是高氏君長皆絕垂拱中以藏孫寶元  
爲朝鮮郡王聖曆初進左鷹揚衛大將軍更封忠  
誠國王使統安東舊部不行明年以藏子德武爲  
安東都督後稍自國至元和末遣使者獻樂工云矣  
百濟扶餘別種也直京師東六千里而贏濱海之  
陽西界越州南倭北高麗皆踰海乃至其東新羅  
也王居東西一城官有內臣佐平者宣納號令內  
頭佐平主帑聚內法佐平主禮衛士佐平典衛兵  
朝廷佐平主獄兵官佐平掌外兵有六方方統十



郡大姓有八沙氏燕氏弱氏解氏貞氏國氏木氏  
首氏其法反逆者誅籍其家殺人者輸奴婢三贖  
罪吏受賕及盜三倍償錮終身俗與高麗同有三  
岳生黃漆六月刺取潘色若金王服太褻紫袍青  
錦袴素皮帶烏革履烏羅冠飾以金縷羣臣絳衣  
飾冠以銀縷禁民衣絳紫有文籍紀時月如華人  
武德四年王扶餘璋始遣使獻果下馬自是數朝  
貢高祖冊爲帶方郡王百濟王後五年獻明光鎧  
且訟高麗梗貢道太宗貞觀初詔使者平其怨又  
與新羅出仇數相侵帝賜璽書曰新羅朕蕃臣王

之鄰國聞數相侵具朕已詔高麗新羅申和王宜  
忘前怨識朕本懷璋奉表謝然兵亦不止再遣使  
朝上鐵甲雕斧帝優勞之賜帛段二千十五年璋  
死使者素服奉表曰君外臣百濟王扶餘璋卒帝  
爲舉哀玄武門贈光祿大夫賻賜甚厚命祠部郎  
中鄭文表冊其子義慈爲柱國紹王義慈事親孝  
與兄弟友時號海東曾子明年與高麗連和伐新  
羅取四十餘城發兵守之又謀取棠項城絕貢道  
新羅告急帝遣司農丞相里玄將齎詔書諭解聞  
帝新討高麗乃間取新羅七城久之又奪十餘城



因不朝貢高宗立乃遣使者來帝詔義慈曰海東  
三國開基舊矣地固犬牙比者隙爭侵校無寧歲  
新羅高城重鎮皆為王并歸窮于朕丐王歸地昔  
齊桓一諸侯尚存亡國況朕萬方主可不卹其危  
邪王所兼城宜還之新羅所俘亦畀還王不如詔  
者任王汝戰朕將發契丹諸國度遼深入王可思  
之無後悔永徽六年新羅訴百濟高麗靺鞨取北  
境三十城顯慶五年乃詔左衛大將軍蘇定方為  
神丘道行軍大摠管率左衛將軍劉伯英右武衛  
將軍馮士貴左驍衛將軍龐孝泰發新羅兵討之

自城山濟海百濟守熊津口定方縱擊虜大敗王  
師乘潮帆以進趨真都城一舍止虜悉眾拒復破  
之斬首萬餘級拔其城義慈挾太子隆走北鄙定  
方圍之次子泰自立為王率眾固守義慈孫文思  
曰王太子固在叔乃自土若唐兵解去如我父子  
何與左右繼而出民皆從之泰不能止定方令士  
超堞立幟泰開門降定方執義慈隆及小王孝演  
酋長五十八人送京師平其國五部三十七郡二  
百城戶七十六萬乃析置熊津馬韓東明金漣德  
安五都督府擢酋渠長治之命郎將劉仁願守百



濟城左衛郎將王文度爲能津都督九月定方以  
所俘見詔釋不誅義慈病死贈衛尉卿許舊臣赴  
臨詔葬孫皓陳叔寶墓左授隆司稼卿文度濟海  
卒以劉仁軌代之璋從子福信嘗將兵乃與浮屠  
道琛據周留城反迎故王子扶餘豐於倭立爲王  
西部皆應引兵圍仁願龍朔元年仁軌發新羅兵  
往救道琛立二壁能津江仁軌與新羅兵夾擊之  
奔入壁爭梁墮溺者萬人新羅兵還道琛保任孝  
城自稱領軍將軍福信保狒霜岑將軍告仁軌曰聞  
唐與新羅約破百濟無豈七孺皆殺之畀以國我與

受死不若戰仁軌遣使齎書且合說道琛倨甚館使  
者于外嫚報曰使人官小我國大將禮不當見徒  
遣之仁軌以衆少乃休軍養威請合新羅圖之福  
信俄殺道琛并其兵豐不能制二年七月仁願等  
破之能津拔支羅城夜薄真峴比明入之斬首八  
百級新羅餉道乃開仁願請濟師詔右威衛將軍  
孫仁師爲能津道行軍摠管發齊兵七千往福信  
顓國謀殺豐豐率親信斬福信與高麗倭連和仁  
願已得齊兵士氣振乃與新羅王金法敏率步騎  
而遣劉仁軌率舟師自能津江偕進趨周留城豐



衆屯白江口四遇皆克火四百艘豐走不知所在  
僞王子扶餘忠勝忠志率殘衆及倭人請命諸城  
皆復仁願勒軍還留仁軌代守帝以扶餘隆爲熊  
津都督俾歸國平新羅故憾招還遺人麟德二年  
與新羅王會熊津城刑白馬以盟仁軌爲盟辭曰  
往百濟先王罔顧逆順不敦鄰不睦親與高麗倭  
共侵削新羅破邑屠城天子憐百姓無辜命行人  
脩好先王負險恃遐侮慢弗恭皇赫斯怒是伐是  
夷但興亡繼絕王者通制故前太子隆爲熊津  
都督守其祭祀附杖新羅長爲與國結好除怨恭

天子命永爲藩服右威衛將軍魯城縣公仁願親  
臨厥盟有貳其德興兵動衆明神監之百殃是降  
子孫不育社稷無守世世毋敢犯乃作金書鐵契  
藏新羅廟中仁願等還隆畏衆攜散亦歸京師儀  
鳳時進帶方郡王遣歸藩是時新羅疆隆不敢入  
舊國寄治高麗死武后又以其孫敬龍王而其地  
已爲新羅渤海靺鞨所分百濟遂絕

新羅弁韓苗裔也居漢樂浪地橫千里縱二千里  
東距長人東南日本西百濟南瀕海北高麗而王  
居金城環八里所衛兵三千人謂城爲侵牟羅邑



在內曰喙評外曰邑勤有喙評六邑勤五十一朝  
服尚白好祠山神八月望日大宴賚官吏射其建  
官以親屬爲上其族名第一骨第二骨以自別兄  
弟女姑姨從姊妹皆聘爲妻王族爲第一骨妻亦  
其族生子皆爲第一骨不娶第一骨女雖娶常爲  
妾媵官有宰相侍中司農卿太府令凡十有七等  
第一骨得爲之事必與衆議號和白一人異則罷  
宰相家不絕祿奴僮二千人甲兵牛馬猪稱之畜  
收海中山須食乃射息穀米於人償不滿庸爲奴  
婢王姓金貴人姓朴民無氏有名食用柳栝若銅

在元日相慶是日拜日月神男子褐袴婦長襦見  
人必跪則以手据地爲恭不粉黛率美髮以繚首  
以珠綵飾之男子剪髮鬚鬣冒以黑巾市皆婦女貧  
販冬則作竈堂中夏以食置冰上畜無羊少驢羸  
多馬馬雖高大不善行長人者人類長二丈鋸牙  
鉤爪黑毛覆身不火食噬禽獸或搏人以食得婦  
人以治衣服其國連山數千里有峽固以鐵闔號  
關門新羅常屯弩士數千守之初白濟伐高麗來  
請救悉兵往破之自是相攻不置後獲百濟王殺  
之滋結怨武德四年王眞平遣使者入朝高祖詔



通直散騎侍郎庾文素持節咨賚後二年拜柱國  
封樂浪郡王新羅王貞觀五年獻女樂二太宗曰  
比林邑獻鸚鵡言思鄉巧還泥於人乎付使者歸  
之是歲真平死無子立女善德爲王大臣乙祭柄  
國詔贈真平左光祿大夫賻物段二百九年遣使  
者冊善德襲父封國人號聖祖皇姑十七年爲高  
麗百濟所攻使者來乞師亦會帝親伐高麗詔率  
兵以披虜勢善德使兵五萬入高麗南鄙拔水口  
城以聞二十一年善德死贈光祿大夫而妹真德  
龍妻王明年遣子文王及弟伊炆貝子春秋來朝拜文

王左武衛將軍春秋特進因請改章服從中國制  
內出珍服賜之又詣國學觀釋奠講論帝賜所製  
晉書辭歸敕二品以上郊餞高宗永徽元年攻百  
濟破之遣春秋子法敏入朝真德織錦爲頌以獻  
曰巨唐開洪業巍巍皇猷昌止戈成大定興文繼  
百王統天崇雨施治物體含章深仁諧日月撫運  
邁時康幡旛旣赫赫鉦鼓何鏗鏗外夷違命者翦  
覆被天殃淳風凝幽顯遐邇競呈祥四時和玉燭  
七耀巡萬方維岳降宰輔維帝任忠良三五成一  
德昭我唐家唐帝美其意擢法敏太府卿五年真



德死帝爲舉哀贈開府儀同三司賜綵段三百命  
太常丞張文收持節弔祭以春秋襲王明年百濟  
高麗靺鞨共伐取其三十城使者來請救帝命蘇  
定方討之以春秋爲嶋夷道行軍總管遂平百濟  
龍朔元年死法敏襲王以其國爲鷄林州大都督  
府授法敏都督咸亨五年納高麗叛衆略百濟地  
守之帝怒詔削官爵以其弟右驍衛首外大將軍  
臨海郡公仁問爲新羅王自京師歸國詔劉仁軌  
爲鷄林道大總管衛尉卿李弼右領軍大將軍李  
謹行副之發兵窮討上元二年二月仁軌破其衆

於七重城以靺鞨兵浮海略南境斬獲甚衆詔李  
謹行爲安東鎮撫大使屯買肖城三戰虜皆北法  
敏遣使入朝謝罪真篋相望仁問乃還辭王以復  
法敏官爵然多取自濟地遂抵高麗南境矣置尚  
良康熊全武漢朔溟九州有都督統郡十或二  
十郡有大守縣有小守開耀元年死子政明襲王  
遣使者朝丐唐禮及它文辭武后賜百凶禮并文  
詞五十篇死子理洪襲王死弟興光襲王玄宗開  
元中數入朝獻果下馬朝霞紬魚牙紬海豹皮又  
獻二女帝曰女皆王姑姊妹違本俗別所親朕不



忍心留厚賜還之又遣子弟入太學學經術帝間賜  
與光瑞文錦五色羅紫繡紋袍金銀精器與光亦  
上異狗馬黃金美髯諸物初渤海靺鞨掠登州與  
光擊走之帝進興光寧海軍大使使攻靺鞨二十  
五年死帝尤悼之贈太子太保命邪壽以鴻臚少  
卿弔祭子承慶襲王詔壽曰新羅號君子國知詩  
書以卿惇懦故持節往宜演經誼使知大國之盛  
又以國人善棋詔率府兵曹參軍楊季應為副國  
高弈皆出其下於是厚遣使者金寶俄冊其妻朴  
為妃承慶死詔使者臨弔以其弟憲英嗣王帝在

蜀遣使泝江至成都朝正月大曆初憲英死子乾  
運立甫非遣金隱居入朝待命詔倉部郎中歸崇  
敬往弔監察御史陸珽顧情為副冊受之并母金  
為太妃會其宰相爭權相攻國大亂三歲乃定於  
是歲朝獻建中四年死無子國人共立宰相金良  
相嗣貞元元年遣戶部郎中蓋墳持節命之是年  
死立良相從父弟敬信襲王十四年死無子立嫡  
孫俊邕明年遣司封郎中韋丹持冊未至俊邕死  
冊還子重興立永貞元年詔兵部郎中元季方冊  
命後二年使者金力奇來謝且言往歲冊故主俊



邕爲主母申太妃妻叔妃而後邕不幸冊今留省  
中臣請授以歸又爲其宰相金彥昇金仲恭王之  
弟蘇金添明巧門戟詔皆可凡再朝貢七年死彥  
昇立來告喪命職方員外郎崔廷弔且命新王以  
妻貞爲妃長慶寶曆間再遣使者來朝留宿衛彥  
昇死子景徽立太和五年以太子左諭德源寂冊  
弔如儀開成初遣子義琮謝願留衛見聽明年遣  
之五年鴻臚寺籍質子及學生歲滿者一百五人  
皆還之有張保臯鄭年者皆善鬪戰工用捨年復  
能沒海獲其地五十里不啻角其勇健保臯不及

也年以兄呼保臯保臯以齒年以藝常不相下自  
其國皆來爲武寧軍小將後保臯歸新羅謁其王  
曰遍中國以新羅人爲奴婢願得鎮清海使賊不  
得掠人西去清海海路之要也王與保臯萬人守  
之自大和後海上無鬻新羅人者保臯旣貴於其  
國年飢寒客漣水一日謂戍主馮元規曰我欲東  
歸乞食於張保臯元規曰若與保臯所負何如柰  
何取死其手年曰飢寒死不如兵死快況死故鄉  
邪年遂去至謁保臯飲之極歡飲未卒聞大臣殺  
其王國亂無主保臯分兵五千人與年持年泣曰



非子不能平禍難年至其國誅反者立王以報王  
遂召保臯為相以年代守清海會昌後朝貢不復至  
贊曰杜牧稱安思順為朔方節度時郭汾陽李臨  
淮俱為牙門都將二人不相能雖同盤飲食常睇  
相視不交一言及汾陽代思順臨淮欲亡去計未  
決旬日詔臨淮分汾陽半兵東出趙魏臨淮入請  
曰一死固甘乞免妻子汾陽趨下持手上堂曰今  
國亂主遷非公不能東伐豈懷私忿時邪及別執  
手泣涕相勉以忠義訖平劇盜實具一公之力知其  
心不叛知其心難也忿必見短知其材益難也此

保臯與汾陽之賢等耳年投保臯必曰彼貴我賤  
我降下之不宜以舊忿殺我保臯果不殺人之常  
情也臨淮請死於汾陽亦人之常情也保臯任年  
事出於已年且寒飢易為感動汾陽臨淮平生冗  
立臨淮之命出於天子權於保臯汾陽為優此乃  
聖賢遲疑成敗之際也世稱周邵為百代之師周  
公擁孺子而邵公疑之以周公之聖邵公之賢少  
事文王老佐武王能平天下周公之心邵公且不  
知之苟有仁義之心不資以明雖邵公尚爾況其  
下哉嗟乎不以怨毒相其心而先國家之憂晉有



新奚唐有汾陽保阜孰謂夷無人哉

日本古倭奴也去京師萬四千里直新羅東南在  
海中島而居東西五月行南北三月行國無城郭  
聯木爲柵落以草茨屋左右小島五十餘皆自各  
國而臣附之置本率一人檢察諸部其俗多女少  
男有文字尚浮屠法其官十有二等其王姓阿每  
氏自言初主號天御中主至彥瀲凡二十二世皆  
以尊爲號居筑紫城彥瀲子神武立更以天皇爲  
號徙治大和州次曰綏靖次安寧次懿德次孝昭  
次天安次孝靈次孝元次開化次崇神次垂仁次

景行次成務次仲哀仲哀死以開化曾孫女神功  
爲王次應神次仁德次履中次反正次允恭次安  
康次雄略次清寧次顯宗次仁賢次武烈次繼體  
次安閑次宣化次欽明欽明之十一年直梁承聖  
元年次海達次用明亦曰日多利思比孤直隋開  
皇末始與中國通次崇峻崇峻死欽明之孫女推  
古立次舒明次皇極其俗椎髻無冠帶跣以行幅  
巾蔽後貴者冒錦婦人衣純色褰長褱襦結髮于  
後至煬帝賜其民錦綫冠飾以金玉文布爲衣左  
右佩銀籜長八寸以多少明貴賤太宗貞觀五年



遣使者入朝帝矜其遠詔有司毋拘歲貢遣新州  
刺史高仁表往諭與王爭禮不平不肯宣天子命  
而還久之更附新羅使者上書永徽初其王孝德  
即位改元曰白雉獻虎魄大如斗碼碯若五升器  
時新羅爲高麗百濟所暴高宗賜璽書令出兵援  
新羅未幾孝德死其子天豐財立死子天智立明  
年使者與蝦蟇人偕朝蝦蟇亦居海島中其使者  
鬚長四尺許珥箭於首令人戴瓠立數十步射無  
不中天智死子天武立死子摠持立咸亨元年遣  
使賀平高麗後稍習夏音惡倭名更號日本使者

自言國近日所出以爲名或云日本乃小國爲倭  
所并故冒其號使者不以情故疑焉又妄夸其國  
都方數千里南西盡海東北限大山其外即毛人  
云長安元年其王文武立改元曰大寶遣朝臣眞  
人粟田貢方物朝臣眞人者猶唐尚書也冠進德  
冠頂有華藻四披紫袍帛帶眞人好學能屬文進  
止有容武后宴之麟德殿授司膳卿還之文武死  
子阿用立死子聖武立改元曰白龜開元初粟田  
復朝請從諸儒授經詔四門助教趙玄默即鴻臚  
寺爲師獻大幅布爲誓衆賞物賀書以歸其副朝



臣仲滿慕華不肯去易姓名曰朝衡歷左補闕儀  
王友多所該識久乃還聖武死女孝明立改元曰  
天平勝寶天寶十一載朝衡復入朝上元中擢左  
散騎常侍安南都護新羅梗海道更繇明越州朝  
貢孝明死大炊立死以聖武女高野姬爲王死白  
壁立建中元年使者真人興能獻方物真人蓋因  
官而氏者也興能善書其紙似蠶而澤人莫識貞  
元末其王曰栢武遣使者朝其學子摘免勢浮屠  
空海願留肄業歷二十餘年使者高階真人來請  
免勢等俱還詔可次諾樂立次嵯峨次淳和次仁

明仁明直開成四年復入貢次文德次清和次陽  
成次光孝直光啓元年其東海嶼中又有邪古波  
邪多尼三小王北距新羅西北百濟西南直越州  
有絲絮怪珍云

流鬼去京師萬五千里直黑水靺鞨東北少海之  
北三面皆阻海其北莫知所窮人依嶼散居多沮  
澤有魚鹽之利地蚤寒多霜雪以木廣六寸長十  
尺系其上以踐冰遂走獸土多狗以皮爲裘俗被  
髮粟似莠而小無蔬菘它穀勝兵萬人南與莫曳  
靺鞨鄰東南航海十五日行乃至貞觀十四年其



王遣子可也余莫貂皮更三譯來朝授騎都尉遣  
之龍朔初有僭羅者其王儒李都羅遣使入朝國  
居新羅武州南島上俗朴陋衣大豕皮夏居草屋  
冬密室地生五穀耕不知用牛以鐵齒把土初附  
百濟麟德中酋長來朝從帝至太山後附新羅開  
元十一年又有達未婁達姑二部首領朝貢達未  
婁自言北扶餘之裔高麗滅其國遺人度那河因  
居之或曰他漏河東北流入黑水達姑室韋種也  
在那河陰凍未河之東西接黃頭室韋東北距達  
未婁云

東夷列傳第一百四十五



卷之四